

PATRIARCHATUS ALEXANDRINUS.

LIBER DECIMUS.

I.
ÆGYPTI DE-
SCRIPTIO.
a Strabo lib. 17.
Geogr.



GYPTUM, id solum, inquit Strabo, prisci vocavere, quod habitatur, & à Nilo irrigatur, à locis Syenæ proximis incipientes usque ad mare: recentiores verò ad hoc usque tempus omnes ferè Orientales partes assumpserunt, quæ inter Arabicum sinum sunt, atque Nilum; ab Occidente autem, loca usque ad Anasæ quæ vocantur, & in ora maritima ab ostio Canopico, usque ad eum locum, qui Catabathmus dicitur, & Cyrenæorum ditionem. Nam Ptolemaici Reges eousque dominationem protulerunt suam: ut

& Cyrenaicam sub se haberent, & eam ab Ægypto Cyproque separarent. Romani qui postea successerunt, provinciam Ægyptum prioribus finibus incluserunt.

b Eustathius ad
Dionysium.

Triangularis est, Eustathio b teste, ac litteræ Δ similis: unde & pars illius Delta vocatur. Ajunt enim in Australi Ægypti parte duos esse montes, in quorum dextro sita est Orientalis prædicta Syene: tam propè autem esse montes inter se, ut vix septem stadiis ab invicem distent: atque ab illis angustis, incipere terram dilatari, versus Boreales partes, quæ sunt circa mare, veluti delta, id est, forma triangulari. Est verò dicta arctior pars, delta, quæ ad 7. stadia patet, ex qua Nilus fluit, ut scribit Herodotus.

c Ptol. lib. 4.
cap. 5.

Sed & præter maximum illud Delta, quod facit Ægyptus quatenus Thebaidem & Arcadium & Ægyptum complectitur, tria alia describit sic Ptolemæus c. Magnum Delta vocatur id, juxta quod divertitur fluvius dictus Agathosdæmon, hoc est, bonus genius, qui per ostium Heracleoticum defluit in amnem appellatum Bubasticum, qui effluit per ostium Pelusiacum.

Vocatur & parvum Delta id, juxta quod scinditur Bubasticus fluvius in amnem Busiriticum, qui excurrit per Pathmeticum ostium. Vocatur & tertium Delta inter prædicta fermè id, juxta quod scinditur Bubasticus ad fluvium per Thribeum oppidum excurrentem, & per Pineptimi ostium egredientem.

Sed ad limites Ægypti latè sumptæ redeamus. Terminos habet à Septentrione mare Ægyptiacum, quod est inter Græciam, Asiam minorem & Ægyptum ipsam: ab Ortu Mare rubrum, usque ad Rhinocoruram urbem, quæ est ultima versus Palæstinam: à Meridie Æthiopiam, quæ non longè à Syene supra Nilum incipit: & ab Occasu Tripolitanam provinciam, quæ est pars Africæ propriæ dictæ, à qua dividitur per lineam ductam ab Aris Philanorum duorum fratrum, usque ad Catabathmum, sive interiorem sinum Sirtis.

II.
ÆGYPTI DI-
VISIO.
d Amm. Mar-
cell. lib. 22.

Porro tres provincias Ammiano d fertur habuisse temporibus priscis, Ægyptum ipsam, Thebaidem & Libyam: quibus duas adjecit posteritas, nimi-